

Referencia para *Ni chigaca lu reunión* *Xhiiña' Dios ne modo nabáninu*

2-8 DE SEPTIEMBRE

CA TESORO ZEEDA LU BIBLIA | HEBREOS 7, 8

«Sacerdote casi Melquisedec»

it-2-S yaza 359

Melquisedec

Rey ni bi'ni' mandar guidxi Salem de dxiqué ne «sacerdote sti' Dios ni nandxó», Jiobá (Gé 14: 18, 22). Melquisedec nga primé sacerdote ni riete lu Stiidxa' Dios, gúcabe sacerdote ante de iza 1933 ante de ca dxi sti' Jesús. Cumu náca-be rey sti' Salem, ni riní «paz» la? nga runi apóstol Pablo bizeete' de laabe casi «rey ni redané paz» ne «rey ni runi ni jneza» purti' nga nga riní labe (Heb 7:1, 2, *TNM*). Nu tu ná de guidxi Salem nga biree guidxi Jerusalén ni guyuu despué. Ne laaca nácabe né diidxa' Salem nga biquiñe' para bizaa lá Jerusalén, nga runi nuu biaje rábicabe ni «Salem» (Sl 76:2).

Binduuxe' Abrán (Abrahán) Kedorlaomer ne ca rey ni de'gu' laa ne de raqué yendá dede lu llanu sti' Savé o «llanu sti' rey, ni riaana xagueté». Raqué gulee Melquisedec «pan ne vinu» ne guluu ndaaya' Abrahán, gúdxibe laa: «¡Guisaca Abrán sti' Dios ni jma nandxó, Ni bizá' guibá' ne guidxilayú ne guisaca Dios ni jma nandxó, ni ma' bidii caní cucaalú lii lu nalu'!». Guní si Abrahán ca diidxa' ca bidiibe Melquisedec ni naca rey ne sacerdote «décima parte de ca cosa ni jma galán» ni gúxhabe ca rey que (Gé 14:17-20; Heb 7:4, *TNM*).

it-2-S yaza 360, párr. 4

Melquisedec

¿Xiñee zanda guininu qué riete dxi gule nin dxi guti Melquisedec?

Pablo bizeete' ti cosa nabé risaca de Melquisedec ora guní, «qué riete gastí de bixhoze be nin jñaá be nin bixhoze gola be, nin dxi gule be nin dxi guti be. Ne zacá zeda aca be casi Xiñi

Dios, purti qué riete pa uyuu dxi biree be de sacerdote gola» (Heb 7:3). Gule ne guti Melquisedec cáscica ti binni. Peru qué riete di' lá bixhózebe ne jñaabe, laaca qué riete de ca familia stibe, caní zá de laabe ne lu Stiidxa' Dios qué riete dxi gúlebe nin dxi gútibe. Ngue runi, bia'si pe' nga bichaagacabe Jesucristu né Melquisedec, purti' qué zusaana de gaca sacerdote. Cáscica qué ñapa Melquisedec tuuxa ni bi'ni' mandar ante de laa ne laaca qué riete pa guyuu tuuxa despué de laa para gaca sacerdote, zaqueca nga qué ñuu sti sumo sacerdote ante de Cristu, ne Biblia rusihuinni qué ziuu di' tuuxa despué de laa. Neca de lu tribu sti' Judá nga jñaá ne bixhoze Jesús ne zabe de familia sti' rey David la? qué nucueeza nga laabe de gácabe sacerdote ne rey. Ne bizaaca ni zacá pur ni bi'ni' jurar Jiobá.

it-2-S yaza 359

Melquisedec

Bihuinni modo chigaca Cristu sacerdote. Lu ti profecía nabé risaca ni caní de Mesías, bi'ni' jurar Jiobá ndi' «Señor» sti' David: «¡Lii nga sacerdote cáscica Melquisedec ne qué zusaana de gácalu' ni!» (Sl 110:1, 4). Bicaa Salmo ri' ca judíu que guini' íqueca' zeeda gaca Mesías, ni cabéza-ca' gueeda que, sacerdote ne laca laa gaca rey. Ne lu carta ni gucuá para ca hebreu, bisiene apóstol Pablo Jesús ngue zeeda gaca Mesías ni maca biete gueeda ora guní «qué ziuu dxi guiaana dxí be de aca be sacerdote gola casi Melquisedec» (Heb 6:19-20; 5:10; laaca zanda gú'ndalu' PACTO).

Guyúbinu ca perla ni ga'chi'

w00-S 15/8 yaza 14 párr. 11

Ca sacrificiu ni riuula'dxi' Jiobá

¹¹ Apóstol Pablo guní: «Ribícabe ca sumo sacerdote que para gudiica' ofrenda ne sacrificiu» (Hebreos 8:3, *TNM*). Bizeete' Pablo chupa tipu

ofrenda ni bi'ni' sumo sacerdote sti' Israel de dxiqué, «ofrenda» ne «sacrificiu» o «sacrificiu pur ca pecadu» (Hebreos 5:1, *TNM*). Rudii binni ofrenda para gusihuinni ruisaca tuuxa ne riuu-la'dxi' ni rúnibe. Laaca rudii binni ni ora nuu gaca xhamigu ti binni, para chuula'dxi' tuuxa ni runi o para gaca tuuxa nacha'hui' né laa (Génesis 32:20; Proverbios 18:16). Zanda guininu stale «ofrenda» ni zeeda lu Ley que b'nicabe ni para chuula'dxi' Dios ni rúnicabe ne gaca nacha'hui' né laacabe. Dxiqué, ora gucheené tuuxa Ley la? naquiñe' gudii xiixa para guixa ni bi'ni' o para gacachaahui' ni, óraque nga naquiñe' gudiicabe «sacrificiu pur ca pecadu». Lu ca libru: Éxodo, Levítico ne Números ni zeeda lu Pentateuco, ruzeete' cani de stale sacrificiu ne ofrenda de guirá' clase. Neca nagana nga guiénenu ne guietenalá'dxinu guirá' xixé detalle sti' guirá' sacrificiu ni bidiicabe dxiqué, caquiñe' guiénenu caadxi cosa risaca de laacani.

it-2-S yaza 574 párr. 4

Pacto

¿Ximodo nga ma' qué niquiñe' pactu sti' Ley que?

Dxi gudxi Dios Jeremías chiguni ti pactu nacubi, casi ora nini'be ma' «qué zaquiñe' di» pactu sti' Ley que (Jer 31:31-34; Heb 8:13, *TNM*). Lu iza 33 d.J. ma' qué niquiñe' di' pactu sti' Ley que ra guti' Cristu pur laanu lu yaga (Col 2:14), ne zaqué ma' pactu nacubi que guyuu lugar pactu sti' Ley que (Heb 7:12; 9:15; Hch 2:1-4).

9-15 DE SEPTIEMBRE

CA TESORO ZEEDA LU BIBLIA | HEBREOS 9, 10

«Bandá' sti' ca cosa galán ni chigueedaru'»

it-2-S yaza 635 párr. 4

Perdón

Lu Ley ni bidii Dios guidxi Israel ná, para ganda gaca perdonar tuuxa ni gucheené Dios o ti binni, primeru naquiñe' quíxebe ni b'ñibe casi ná Ley que, ne stale biaje la? naquiñe' gudiibe rini

sti' ti manihuiini' casi ofrenda para Jibá (Le 5:5-6:7). Ngue runi Pablo guní: «Pur ni cá lu ley nanna nu irá ni guía naquiñe' guía ne rini, ne pa qué ixii rini la? qué zanda guixa xpecadu cabe» (Heb 9:22). Neca gudiicabe clase sacrificiu ri', qué zanda di' guxhiá rini sti' ca manihuiini' que pecadu sticabe ne qué zanda gudii sacrificiu ri' laacabe ti conciencia nayá (Heb 10:1-4; 9: 9, 13, 14). Peru pur pactu nacubi que dxandipe' zanda gaca perdonar ca pecadu sti' binni ne zanda guilá pur guendaguti sti' Jesucristu (Jer 31:33, 34; Mt 26:28; 1Co 11:25; Ef 1:7). Dxi guyuu Jesús lu Guidxilayú ri' bisihuinni napa derechu de guni perdonar pecadu sti' binni ra bisianda ti hombre ni qué rizá (Mt 9:2-7).

w14 15/11 yaza 12 párr. 13

Xiñee naquiñe' gácanu nayá

13 (Biinda' Efesios 1:7). Ra bidii Jesús xquenda-nabani para gulá binni risácani stale para cani nadxii laabe ne para cani nadxii Bixhózebe (Gál. 2:20). Peru ni dxandipe' bixhá stóndanu nga ni bi'ni' Jesús despué de guti ne biasa de lade gue'tu'. Ne ngape' nga ni guca Dxi Rixá Stonda Binni casi na Ley que. Dxi que, xaíque sti' ca sacerdote riuu lugar ra jma nandxó' sti' tabernáculo que —ne despué ra jma nandxó' sti' templu que—, ne raqué rinebe caadxi rini nezalú Jibá, casi ñaca nuzuhuaabe nezalú (Lev. 16: 11-15). Ne ngaca nga ni bi'ni' Jesús despué de biasa lade gue'tu', guyebe guibá', guyuube nezalú Jibá ne raqué bilui'be laa pabiá' risaca rini ni bixhiibe (Heb. 9:6, 7, 11-14, 24-28). ¡Nabé rudi'-nu xquíxepe' Jesús pur ni bi'ni'! Pur fe ni nápanu lu rini ni bixhii Jesús ri', ruXHá Dios stóndanu ne zanda chu' xquendabaaaninu nayá.

it-2-S yaza 638 párr. 7

Perfección

Perfectu Ley ni gucuaa Moisés que. Lu Ley ni gucuaa Moisés para guidxi Israel que, zeeda caadxi cosa ni caquiñe' gúnicabe, casi chu' caadxi sacerdote ne gudiicabe mani' casi ofrenda. Ne casi bizeete' apóstol Pablo, neca perfectu Ley que purti' zeeda ni de Dios, qué zanda di'

guni ca sacerdote ne ca ofrenda que ca israelita perfectu (Heb 7:11, 19; 10:1). Lugar de nibeeni laacabe de lu ná' pecadu ne guendaguti, jmaru' si gúnnacabe xii nga pecadu (Ro 3:20; 7:7-13). Guirá' ni gudxi Dios laacabe gúnicabe, biquiíñe' ni casi ti tutor ni yené guirá' binni ra nuu Cristu, ne guca ni ti «bandá' sti' ca cosa galán ni chiguedaru» (Gál 3:19-25; Heb 10:1, *TNM*). Nga runi ora guni' Pablo «qué ñanda di niquiíñe ley sti Moisés pur ni naca binni guidxilayú» (Ro 8:3), cani'be (casi ruzeete' Hebreos 7:11, 18-28) qué zanda di' gulá sumo sacerdote ca binni que (casi ná Ley que, laabe nga ni naquiíñe' gúnibe ca sacrificiu que ne laasibe nga riuube ndaani' Santísimo dxi rixá stonda binni né rini sti' sacrificiu que). Neca biquiíñe' ca sacrificiu ni bidii ca sacerdote ni zá de Aarón para chuula'dxi' Dios ni runi guidxi que, peru qué ñuni di' ni laacabe binni perfectu. Apóstol que bizeete' de laani ora guni' qué zanda di' gaca conciencia sti' cani runi adorar Dios perfectu (Heb 10:1-4; laaca zanda gúndalu' Heb 9:9). Qué zanda quixe sumo sacerdote bia' caquiíñe' para guixiá ca pecadu sti' binni. Dxiíña' si sti' Cristu casi sacerdote ne sacrificiu bidiibe que nga zanda guxhiá ca pecadu sti' binni (Heb 9:14; 10:12-22).

Guyúbinu ca perla ni ga'chi'

w92-S 1/3 yaza 31 párr. 4-6

Ni rinabadiidxa' cani ruunda'

Pablo bizeete' caquiíñe' guixii rini para guihiinni dxandí' zaca cumplir ca pactu ni guni Dios né binni guidxilayú. Nga nga bizaaca né pactu sti' Ley que. Biquiíñe' Dios Moisés para gunda guni' né guidxi Israel. Nabé risaca dxiíña' bi'ni' Moisés, laabe guní'nebe ca israelita para gunda bí'nica' pactu que né Dios. Nga runi, zanda guininu, Moisés nga binni ni bi'ni' pactu sti' Ley que, peru ni gudixhe chu' ni nga Jiobá. Peru ¿ñee gupa xidé bixhii Moisés rini sti' para gunda gupa pactu que valor la? Co'. Lugar de nga, biiticabe mani' ne biquiíñe' rini stícame casi ofrenda (Hebreos 9:18-22).

¿Laga pactu nacubi bi'ni' Jiobá né Israel espiritual que ya? Nabé risaca dxiíña' bi'ni' Jesucristu, laabe nga biquiíñe' Jiobá casi Mediador para bi'ni' pactu que né Israel espiritual. Neca Jiobá nga gudixhe chu' pactu ri', peru caquiíñe' ni Jesucristu. Aparte de nácabe Mediador sti' pactu que, dxi guyuu Jesús lu Guidxilayú binibia'be ca primé binni ni chichuu lu pactu que (Lucas 22:20, 28, 29). Nánnanu Jesús si nga binni ni runi cumplir ca requisito ni caquiíñe' para gudii xquendanabani casi sacrificiu. Cadi caquiíñe' di' mani' para gaca sacrificiu que, sínuque caquiíñe' gati' ti binni sin donda. Nga runi Pablo guni' Cristu ngue binni biquiíñe' para guca pactu nacubi que. Después de bigueta' Cristu guibá' «ma' caní' né be Dios pur laanu» ne zacá gunda bizulú pactu nacubi que (Hebreos 9:12-14, 24).

Neca guni' Pablo bi'ni' Moisés ne Jesús pactu, peru qué niní'dibe laaca' nga gudíxheca' chu' ca pactu que, sínuque Dios. Gupa xidé biquiíñe' guiro'pa' hombre ri' casi Mediador para guca ca pactu que. Ne guiro'pa' pactu ri' biquiíñe' ni ti sacrificiu, casi Moisés la? biquiíñe' mani', peru Jesús la? gupa xidé bidii xquendanabani para ganda chu' binni lu pactu nacubi que.

it-1-S yaza 291 párr. 4

Bautismo

Lucas bicaa, cayuni orar Jesús ora guyuunisa (Lu 3:21). Ne hombre ni bicaa carta para ca hebreu guni' ora «bedandá Cristu ndaani guidxilayú» (cadi dxi gúlebe, purti' qué zanda guini'be ca diidxa' ri', sínuque dxi guyuunísabe ne bizulube xhiíña' Dios), bizeetebe ni ná Salmo 40:6-8: «Qué ñuula'dxu nicoou rini sti' mani', nin xiixa nusiga'de cabe lii, sínuque gudixhe lu naa gueda aca binni guidxilayú. [...] Dios stinne', rarí nuua para gune ni na lu', casi cá ni lu Xqui'chi lu de naa» (Heb 10:5-9). Ca judíu nga bi'niné Dios pactu sti' Ley que, ne cumu lade ca judíu gule Jesús la? nga runi maca nuube lu pactu que dxi guyebe ra nuu Juan para cú'nisa laabe (Éx 19:5-8; Gál 4:4). Bí'nibe jma que bia' canaba' Ley que. Bidiibe laabe Bixhózebe Jiobá para

gúnibe ni ná, ne bidiibe xquendanabánibe ti ma' cadi guuticabe mani' para gaca ofrenda casi ná Ley que gúnicabe. Apóstol Pablo bizeete': «Ma uca ni gudixhe Dios que, purti ma bidii Jesucristu xpida para guiaxa stonda nu tobi si tiru, ne pur ni bi'ni be que ma bia ladxidó' no» (Heb 10: 10). Laaca gudixhe Jiobá guni Jesús xhiña' Reinu ne Jesús guná bi'ni' dxiiña' rí' (Lu 4:43; 17:20, 21). Guyuula'dxi' Jiobá ni bi'ni' Xiiñi' ra bi'ni' ungirbe laa né espíritu santu ne gúdxibe laa: «Lii nga Xiiñe ni nadxiee ne ni rusieche naa» (Mr 1: 9-11; Lu 3:21-23; Mt 3:13-17).

16-22 DE SEPTIEMBRE

CA TESORO ZEEDA LU BIBLIA | HEBREOS 11

«Xiiñee nabé risaca gápanu fe»

w16.10 yaza 27 párr. 6

Gápanu fe lu cani ma' bidii stiidxa' Jiobá

6 Chupa modo nga rusiene Biblia xii nga fe. Si-carí' nani: «Fe nga chu'nu seguru de ca cosa ni cabézanu ne laani nga ca cosa ni runi crenu dxandí' zaca neca qué rihuinni cani» (Hebreos 11:1, *TNM*). Primé la? nani fe nga «chu'nu seguru de ca cosa ni cabézanu». Ca cosa ni cabézanu nga cani ma' bidii stiidxa' Dios chiguni. Nuunu seguru zabeebe guirá' ca cosa malu ca ne ziuu ti guidxilayú cubi. Ne guiropa, Biblia na fe nga «ca cosa ni runi crenu dxandí' zaca neca qué rihuinni cani». Caadxi de cani dxandí' nuu peru qué ridú'yanu nga Jiobá, Jesucristu, ca ángel ne Reinu ni nuu guibá' (Hebreos 11:3). Ximodo rusihuínninu dxandí' nápanu fe lu cani ma' bidii stiidxa' Dios ne lu ca cosa ni qué ridú'yanu ya'. Rusihuínninu ni pur modo nabáninu ne pur ni rininu ne pur cani rúninu.

w13 1/11 yaza 11 párr. 2-5

Riguu Dios ndaaya' cani ruyubi laa de guidubi ladxidó'

Xi caquiiñe' gúninu para gusiéchenu Jiobá ya'. Pablu bicaa ca diidxa' rí': «Qué zanda guni binni ni riula'dxi Dios pa qué runi cre» laabe. Cadi na di' apóstol Pablu «nagana» ni, sínuque

guni'be «*qué zanda*». Ni nabe rari' nga naquiiñe' guni crenu Dios para ganda gusiéchenu laa.

Yanna, ximodo rusihuinni binni runi cré ya'. Nu chupa modo gusihuínninu ni. Primeru la? napa «xidé guni cre cabe nuu be», purti' qué zanda di' gusiéchenu Dios pa qué runi crenu nuube. Peru cadi ngasi nga ni naquiiñe' gúninu purti' dede ca demonio ca runi creca' nuu Dios (Santiago 2: 19). Ora laanu runi crenu dxandí' nuu Dios la? zucaa nga laanu gúninu ni riula'dxi' Dios, o guibáninu modo riulá'dxibe (Santiago 2:20, 26).

Ne guiropa la? naquiiñe' guni crenu «rulabi be cani uyubi laabe», o riguube ndaaya' laaca'. Binni ni napa fe la? nanna dxichi «cadi pur gana si cayuni» stipa para guibani modo riula'dxi' Dios (1 Corintios 15:58). Ñee zanda xa gusiécheno Dios pa qué guni crenu racalá'dxibe uguube ndaaya' laanu o qué zanda gúnibe ni (Santiago 1:17; 1 Pedro 5:7). Pa rini' íquenu cadi nacha'hui' Dios, qué rusisácabe laanu o qué rizaalá'dxibe laanu la? qué liica runibia'nu laabe.

Tuu nga cani riguu Dios ndaaya' ya'. «Cani uyubi laabe», na Pablu. Ti libru ni riquiiñe' ca binni ni rutiixhi Biblia na, diidxa' ni biquiiñecabe lu griegu para «uyubi laabe» ca, qué riní'sini «racalá'dxi' binni guidxela' xiixa», sínuque ruyubi laabe para guni «adorar laabe». Sti libru na, diidxa' ni biquiiñecabe racá, rini'ni guyubi lele binni xiixa ne gúninu de guidubi ladxidó'. Nga runi, riguu Jiobá ndaaya' ca binni ni rucaa fe stica' laaca' guni adorarca' laabe purti' de guidubi ladxido'ca' nadxiica' laabe (Mateo 22:37).

w16.10 yaza 23 párr. 10, 11

Guquídxinu fe stinu lu ca cosa ni cabézanu

¹⁰ Lu capítulo 11 sti' Hebreos, guni' Pablu ca diidxa' rí': «Laca uyuu caadxi gunaa runi cre Dios, guti binni lidxi ne bibani. Ne laca uyuu xcaadxi xpinni Dios guti ra bininá cabe laa purti runi cre Dios, ne qué niná ca nilá ca', purti nanna ca jma galán gati ca» ne zabánica' sti biaje (Hebreos 11:35). Stale xpinni Dios qué nucheeneca' laa neca gudí'dica' lu guendanagana purti' gúpaca'

fe dxandí' zandisa' Dios laaca' de lade gue'tu' casi maca bidii stiidxa'. Gúnnacabe zudxigueta' Jíobá xquendanabánicabe despué ne zabánicabe sin gáticabe lu Guidxilayú. Guiní' íquenu ni bizaaca Nabot ne Zacarías. Bichá binni guié laacabe dede ra gúticabe purti' bizuubacabe stiidxa' Dios (1 Reyes 21:3, 15; 2 Crónicas 24: 20, 21). Bisábacabe Daniel ndaaní' ti bizé ra nuu caadxi lión ni candaana, ne chonna xhamígu-be guluucabe laaca' ndaaní' ti horno ni caguí. Guyuucabe dispuesto gáticabe para cadí gucheenécabe Dios. Gupa ca hombre rí' fe zudii Jíobá laaca' espíritu ne zacané laaca' guni huan-tarca' intiica yuuba' tiídica' (Daniel 3:16-18, 20, 28; 6:13, 16, 21-23; Hebreos 11:33, 34).

¹¹ Stale profeta bí'ni' búrlacabe laaca' o bisegu-yoocabe laaca', casi Micaya ne Jeremías, peru bí'ni' huantárcabe caní. Ne xcaadxi profeta casi Elías, «uzá ca guí'xhi ne lade daní ne ndaaní cueva ne ndaaní bizé». Guirácabe guyuucabe seguru de ca cosa ni cabézacabe ne pur ngue qué nucheenécabe Dios neca gudí'dicabe lu stale guendanagana (Hebreos 11:1, 36-38; 1 Reyes 18:13; 22:24-27; Jeremías 20:1, 2; 28:10, 11; 32:2).

Guyúbinu ca perla ni ga'chi'

it-1-S yaza 920 párr. 3

Fe

Caadxi binni ni gupa fe dxiqué. Apóstol Pablo bizeete' de caadxi «binni ni bini cre Dios» dxi-qué (Heb 12:1) ne cada tobi de laaca' gúpaca' ti razón para bí'ni' creca' Dios. Guzé'tenu ejemplu sti' Abel. Nanna Abel bí'ni' prometer Dios ziuu ti «descendencia» ni gucaache ique beenda' que. Ne laapebe biyyabe ora guca cumplir castigu ni gudixhe Jíobá para jñaabe ne bixhózebe ndaa-ní' jardín de Edén que. Nabé naná gúcani para Adán ne familia sti' bireesica' ndaaní' jardín que, cumu ma' qué gapa Guidxilayú rí' ndaaya' sti' Dios la? ma' bigaa stale yaga guichi luni ne gupa xidé bí'nica' dxiiña' nadipa' para gápaca' ni go-ca'. Zándaca biyya' Abel pabiá' ruyubi Eva gulabi

xheela' laa ne biyyabe ma' Adán runi mandar laa. Zándaca gudxi jñaabe laabe pabiá' naná nga xhiuuba' ba'du' ne pabiá' naná nga ora ma' chí-gapa xiiñi'. Laaca biyyabe cayapa ca querubín entrada sti' jardín ni nuu Edén que, ne biyyabe ti espada naze bele ni cudii vuelta (Gé 3:14-19, 24). Para Abel la? guca guirá ni bí'ya' rí' «prueba ni rusihuinni» dxandí' zalá binni pur descendencia ni maca guní' Dios que, ne bicaa fe stibe laabe gudiibe «ti sacrificio Dios, tobi ni jma risaca que ni bidii Caín» (Heb 11:1, 4, *TNM*).

wp17.1-S yaza 12, 13

Gúnnabe guyuula'dxi' Dios guirá' ni rúnibe

Yanna, ¿ximodo nga «gucuaa Dios Enoc para cadí guni sufrir ora gati'»? Zándaca gucuaa Dios laabe ne bidii lugar gátibe sin guni sufrirbe lugar de guuti ca enemigu stibe laabe. Peru ¿ximodo gunna Enoc ante gati', riuula'dxi' Dios guirá' ni runi ya'? Zándaca bidii Dios lugar gú'yabe ti visión ra bí'yabe ma' naca Guidxilayú rí' ti paraí-su. Despué de biyyabe visión rí', gútibe. Bizeete' apóstol Pablo de Enoc ne de xcaadxi hombre ne gunaa ni qué nusaanaca' Dios, laabe bicaa-be: «Naguidxi guca fe sti' guirácabe dede dxi gúticabe» (Hebreos 11:13, *TNM*). Guti si Enoc, zándaca biyubi ca xhenemigu cuerpu sti' peru qué nidxélaca' ni purti' bicaachi' Jíobá ni. Ne pur ni bí'ni' Jíobá rí' ma' que ñanda niguítecabé cuerpu stibe o niquiinecabe ni lu xiixa ritual.

23-29 DE SEPTIEMBRE

CA TESORO ZEEDA LU BIBLIA | HEBREOS 12, 13

«Rusihuinni Jíobá nadxii laanu ora riguu jneza laanu»

w12 15/3 yaza 29 párr. 18

Cadí guyadxinu caní ma' bisaananu

¹⁸ **Ora uguu jnézacabe laanu.** Zándaca guida'-nu xiana pur xiixa conseju ni bidicabe laanu dxiqué. Peru pa gúninu zacá jma ziu'nu triste, zadxiichinu dede zare'nu gana (Heb. 12:5). Pa guicaanu conseju ni gudiicabe laanu peru

despué ma' qué chinándanu conseju ca la? pur gana si bidiicabe ni laanu. Ora guizaacanu zacá, galán chinándanu conseju bidii Salomón: «Gudaapi dxiichi' ca conseju ca. Cadi gundaalu' ni. Gúpáni, purti' laani nga xquendanabánilu'» (Pro. 4:13). Caquiiñe' gúninu cásica runi ti binni ni zigusá carru sti' lu carretera ora gu'ya' ti seña: ruzuuba' diidxa' ne rinanda ni gábini laa (Pro. 4: 26, 27; **biinda' Hebreos 12:12, 13**).

w12 1/10 yaza 21 párr. 3

«Ora iní' né tu Dios la? sicari' nga iní' tu: «Bixhoze du»»

Ti binni ni nadxii xiiñi' riguu jneza laabe, purti' rizaala'dxi' gácabe ti binni nuu xpiaani' (Efesios 6:4). Neca qué zaree cué' bixhózebe de ni ma' guní' la? qué ziuu dxi gaca naduxhu' ora ma' caniné laabe. Zaca nga runi Bixhózenu ni nuu guibá' ora guuya' caquiiñe' uguu jneza laanu. Lugar de guninabe laanu, rusihuínnibe nadxiiibe laanu ora rulidxebe laanu. Zaqueca bi'ni' Jesús, laa qué ñuu dxi ñaca naduxhu' né ca discípulo sti', sínuque gúcabe nacha'hui' né laaca' neca nuu tiru bindaa para yenándaca' conseju bidiibe laaca' (Mateo 20:20-28; Lucas 22:24-30).

w18.03 yaza 32 párr. 18

«Bidii lugar uguu jnézacabe lii, para gácalu' ti binni nuu xpiaani'»

¹⁸ Dxandi', ora riguu jnézacabe tuuxa racaná, peru ti binni qué riná guicaa ni jmaru' si racaná (Heb. 12:11). Guidú'yanu chupa ejemplu: sti' Caín ne sti' rey Sedequías. Dxi bi'ya' Dios nanala'dxi' Caín bi'chi' ne racala'dxi' guuti laabe la? sicari' gudxi laabe: «¿Xiñee cadxiichilu' ne nuulu' triste pue? Pa gúnilu' ni jneza, ¿ñee cadi zasaca ni gúnilu' la? Peru pa qué gúnilu' ni jneza, casi ñaca cabeza guendaruchee lii ra puerta' stilu' casi xiixa ni nadipa' ni nuu guxuuxe lii; peru ¿ñee zanda gucueezalu' ni la?» (Gén. 4:6, 7). Triste guininu ni, peru qué nucaadiaga Caín ni gudxi Jiobá laa, biitibe bíchibe, ngue runi gucanabe bia' dxi bibánibe (Gén. 4:11, 12). Pa ñuni Caín ni gudxi Jiobá laa la? qué ñacaná.

Guyúbinu ca perla ni ga'chi'

w11 15/9 yaza 17 párr. 11

Guxó'ñenu lu neza sti' Jiobá sin guidxáganu

¹¹ Ca binni ni rié ndaani' ti estadiu para chiguu-ya ra chichite tuuxa, qué riésica' para gú'yaca' tu guni ganar, sínuque riega' para uguuca' gana ca xpinnica'. Zacagá nga zeeda gaca ca binni ni bi'ni' cré Dios dxiqué, casi ñaca nabanirúca-be tiempu bibani Pablu ne caguucabe gana ca xpinni Cristu ni nabani lu primé siglu ti ganda gúnica' ni na Dios. Ximodo ndi' caguucabe gana binni ya'. Purti' bí'nicabe ni na Dios dxi bibánicabe, zacá nga casi ñaca guyuucabe lu ti carrera ne bi'ni' ganárcabe premiu stícabe. Nécape' ma' gúticabe, zanda guininu casi ñaca nabanirúcabé, purti' caguucabe gana ca xpinni Cristu para ganda guni ganarca'. Yanna, ximodo zuni sentir cani deru' binibiá' Dios, ora gánnaca' casi ñaca cayuuyadxi' caadxi binni ni ma' bixoo-ñe' lu ti carrera ri' dxiqué laaca' ya'. Zucaani laacabe guxooñecabe bia' gándati' dede guni ganárcabe. Pa gunda bi'ni' ganar ca binni ni bi'ni' cré Dios dxiqué la? laacabe laaca zanda guni ganárcabe, neca guidxaagalúcabe guendanagana. Pa guini' íquecabe ximodo bi'ni' ganar ca binni ca dxi bibánica' la? zacaneni laacabe para gá-cacabe nadxibalú ti ganda sácabe lu neza ni gudixhe Dios sin guireecabe gana. Nabe gucané conseju ni bidii Pablu ri' ca hebreu ni bibani lu primé siglu, ne laaca zacaneni laanu tiempu ri'.

w89-S 15/12 yaza 22 párr. 10

Gudi'nu sacrificiu ni gusieche' Jiobá

¹⁰ Nga runi, cadi naquiiñe' gudii ca hebreu lugar chu' tu quite laaca' ra guni creca' cani rusiidi' ca judíu ni zinanda Ley gucuaa Moisés (Gálatas 5:1-6). Cadi pur ni rusiidi' ca binni ri' nga ni zacané laacabe guzuhuaacabe dxiichi', sínuque pur guendanacha'hui' sti' Dios. Rulu' si' gudinde-diidxa' caadxi de laacabe pur ni roca' ne pur ca sacrificiu que, purti' gudxi Pablo laacabe: «Ni dxandi' zacané laatu para guzuhuaatu dxii-chi' nga guendanacha'hui' sti' Dios ne cadi xiixa ni goto, purti' ca ni jma ruisaca guendaró la?

qué racaneni laaca'». Ni rusihuinni dxandí' zu-
huaa dxichi tuuxa nga guni adorar Dios jneza ne
gusisaca sacrificiu sti' Cristu ne cadi pur ni gó o
purti' si rusisaca xiixa dxi (Romanos 14:5-9). Ne
purti' sacrificiu sti' Cristu que ma' gudixe ni tobi si
tiru guirá' sacrificiu ni rinaba' Ley que (Hebreos
9:9-14; 10:5-10).

30 DE SEPTIEMBRE HASTA 6 DE OCTUBRE

CA TESORO ZEEDA LU BIBLIA | SANTIA- GO 1, 2

«Ca cosa ni rucaa binni guchee ne ni riné laa lu guendaguti»

g17.4-S yaza 14

Tentación

Tentación nga ni ruquiinde binni guni xiixa, ne
jmaru' si pa ti cosa malu ni. Quíxhenu ti ejem-
plu, bixui'lú zisilu' ne málasí biyalu' xiixa ni guizá'
guyuulá'dxilu' ne rábilu': «nin cadi nagana nicaa'
ni sin ñuuya' guirutí' naa». Peru conciencia stilu'
cayabi lii cadi gúnilu' ni, ngue runi ma' qué ñú-
nilu' ni cuquiinde lii que. Zaqué nga bi'ni' ganarlu'
tentación que.

NI RUSIIDÍ' BIBLIA

Cadi purti' si uquiinde laanu gúninu xiixa cosa
malu nga maca nácanu ti binni malu, Stiidxa
Dios rusiene laanu guiranu nga ridxaagalunu
tentación (1 Corintios 10:13). Ni risaca nga ximo-
do runi reaccionarnu ora ridxaagalunu ni. Nu
binni riuula'dxi' guni cosa malu nga runi rusaba
tentación laa, peru laaca nuu binni ni naguee-
ndaca rucaaná' ni purti' nanna cadi jneza ni.

*«Ni riula'dxi nu ni cadi jneza, nga nga ni ru-
quiinde laanu, purti ricá ique nu ni, ne zacá
randa riguba yu ni laanu dede inaaze dxiichi ni
laanu» (Santiago 1:14).*

g17.4-S yaza 14

Tentación

Biblia rusiene xii nga ca cosa ni rucaa binni gu-
chee. Santiago 1:15 ná: «Ne ni qué usaana de

icá ique ni cadi jneza la? zuchee» cásica ti gunaa
ni nacaxiíñi' qué zanda gucueeza de gale xiiñi' za-
caca qué zanda gucueezanu laanu de guche'nu
pa qué cueenu ti cosa malu ndaani' íquenu. Peru
zanda gucueezanu laanu purti' cadi nácanu es-
clavu sti' ca deseú stinu.

Guyúbinu ca perla ni ga'chi'

it-2-S yaza 263 párr. 3

Luz, I (Biaani')

Jiobá nga «Dios ni bizá' ca biaani sti ibá'» (Snt
1:17). Cadi ma' bidiisibe «Gubidxa para guzaani'
dxi ne ma' gudíxhebe guzaani' beeu ne ca be-
leguí huaxhinni» (Jer 31:35), sínuque ra nuube
nga cadá ni dxandí' ni zeeda gaca casi biaani'
(2Co 4:6). Ley stibe, modo runi juzgarbe binni ne
stiidxabe, zeeda gaca cani casi ti biaani' peru
para si cani ná' sá' lu neza stibe (Sl 43:3; 119:
105; Pr 6:23; Isa 51:4). Ti hombre bicaa Salmo
guní' «pur biaani' stilu' zanda gúyadu biaani'» (Sl
36:9; bichaaga ni né Sl 27:1; 43:3). Cásica ora
zirá gueela' ze' ora jma ma' ziyaani' «dede guíaa-
ni' dxindxí», zacaca ze' ora jma ziyaani' neza sti'
ca binni ni runi ni jneza pur guendanuuxpiaani'
sti' Dios (Pr 4:18). Ora runi ti binni ni ná Dios
zacá nga casi ñaca zizá lu neza ni naya'ni' sti'
Dios (Isa 2:3-5). Peru ora ti binni qué runi ni ná
Dios, nuu zitu de Dios, casi ñaca nuu lu ti gue-
lakahui. Jesús bisiene ni sicarí': «Peru pa ruyubi
tu gu'ya tu ni cadi jneza la? zacahui xquenda
biaani tu. Ne pa ñui' ni napa tu de biaani ca la?
pabiá' nacahui ñaana tu» (Mt 6:23; bichaaga ni
né Dt 15:9; 28:54-57; Pr 28:22; 2Pe 2:14).

w18.06 yaza 19 párr. 15

Iquiñenu ca ley ne ca principiu sti' Dios para gusí'dinu conciencia stinu

¹⁵ Ti ley ni jma risaca ni naquiiñe' chinanda ca
xpinni Cristu nga gannaxhiica'. Nga runi gudxi
Jesús ca xpinni: «Pa ganaxhii saa tu zacá la?
zanna binni xpinne laatu» (Juan 13:35). Santia-
go, medio hermanu sti' Jesús, guní' laani nga ti
ley ni jma risaca (Sant. 2:8). Ne Pablo guní': «Ra
ganaxhii tu binni ma cayuni tu irá xixé ni na ley»

(Rom. 13:10). Nga runi, nabé ruzeete' Biblia pabiá' risaca nga gannaxhiinu «purti de Dios nga reeda enda ranaxhii» (1 Juan 4:8). Cadi runi sentir si Jiobá guendarannaxhii, sínuque rusihuínnibe ni. Ne apóstol Juan pe' guní' ma' biluí' Dios «laanu pabiá' nadxii laanu ra biseenda tobi lucha Xiiñi ndaani guidxilayú, beda udii laanu enda nabani ni qué zaluxe» (1 Juan 4:9). Nga runi ora rusihuínninu nadxiinu Jiobá, Jesús, ca hermanu stinu ne xcaadxi binni la? rusihuínninu ma' riénenu ne ma' biniisinu lu Stiidxa' Dios (Mat. 22:37-39).